

ЖОЛДАУҒА – ҚОЛДАУ

Нұрлы жолмен баянды болашаққа қадам жасайық

Рахымбек КАМАЛДИНОВ,
М.Әуезов атындағы Оңтүстік Қазақстан
Мемлекеттік университетінің
Тәрбие ісі және жастар саясаты
департаментінің директоры,
Шымкент қаласы

Бүгінгі таңда еліміз – қиын кезеңдерді бастан өткеріп, тарих сынынан сүрінбей өтіп, жаңа даму жолына түскен мемлекеттердің бірі.

Сан ғасырлық көне тарихы бар еліміз, тәуелсіздік жылдары да өзінің бірегей бітім-болмысын жоғалтпай, әлемге танылды. Кең байтақ даламыздағы түрлі ұлттар мен ұлыстарды бір мақсатқа тоғыстырып, еліміздің іргесін бекітіп, көсегесін көгерте түскен Елбасымыз Н.Назарбаевтың сарабдал саясаты. Бүгінде еліміз дамудың жаңа деңгейіне көтеріліп, әлемдегі бәсекеге қабілетті 50 мемлекеттің қатарына қосылды. Индустриалдық-инновациялық бағдарламалар шеңберінде ел экономикасы өркендеп, қарыштап дамуда.

Қазіргі таңда бүкіл әлем елдерінің экономикасы күрделі кезеңді бастан өткізуде. Кейбір мемлекеттер жаһандық қаржы-экономикалық дағдарыстан шыға алмай жатса, ал кейбір елдердің экономикалық дамуы құлдырау үстінде. Геосаяси дағдарыс пен жетекші елдердің санкциялық саясаты секілді үдерістер де әлемдік экономиканың бір бөлшегі ретінде Қазақстанға да тікелей ықпал етуде. Әлем елдеріне экспортталатын шикізат ресурстары бағасының төмендеуі де ел экономикасының дамуын баяулатуда. Еліміз үшін осы бір күрделі кезеңде жаһандық сын-қатерлерге жауап ретінде Елбасымыз Нұрсұлтан Назарбаев «Нұрлы жол – болашаққа бастар жол» атты Жолдауын жариялады.

«Нұрлы жол» бұл жаңа экономикалық саясат, еліміздің дамуына тың серпін беретін құжат. Биылғы Жолдау еліміздің әлеуметтік-экономикалық әлеуетін одан әрі жақсартуға бағытталған іс-шаралардың жоспары. Бұл жолы да Елбасымыз көрегендік танытып, әлемде орын алған қаржы дағдарысының алдын алып, «Нұрлы жол» жаңа экономикалық саясатымен еліміздің экономикасының даму бағыттарына қайта бағдар-

лау жүргізді. «Ерте қамданғанның ертеңі жақсы» деген халық қағидатын басшылыққа алған Елбасымыз Н.Назарбаев Жолдауда: «Таяудағы жылдар жаһандық сынақтардың уақыты болады. Әлемнің бүкіл архитектурасы өзгереді. Барлық елдер осы күрделі кезеңнен лайықты өте алмайды. Бұл шептен тек мықты мемлекеттер, жұдырықтай жұмылған халықтар ғана өтетін болады» деп ерекше атап өтті. Жұдырықтай жұмылып, татулық пен тұтастықты сақтай отырып, ел экономикасы мен халықтың әл-қуатын арттыру жолында аянбай тер төгіп, еңбек етуге шақырып отыр. Жолдауда айтылған негізгі өзекті мәселелер, ол еліміздің экономикасын одан әрі жетілдіруге, көліктік, энергетикалық, индустриялық және әлеуметтік инфрақұрылымдарды, шағын және орта бизнесті дамытуға бағытталған.

Мемлекет басшысы өз сөзінде: «Мықты мемлекет күнкөріс саясатымен емес, жоспарлау саясатымен, ұзақ мерзімді дамумен және экономикалық өсумен айналысады» деп айтқандай, бұл кезекті Жолдау да «Мәңгілік Ел» мұратына «Нұрлы жолмен» жаңа экономикалық саясатты жүзеге асыра отырып жетуді жоспарлап отыр.

Еліміздің дамуының саяси бағыты, түпқазығы «Мәңгілік Ел» идеясын жүзеге асыру жолында еңбек ету бүгінгі күннің негізгі қағидасына айналып отыр. Бүгінгі таңда тәуелсіз елімізді «Мәңгілік Ел» етуді мұрат етіп отырмыз. Осы арман мұратымызды жүзеге асыру жолындағы міндеттерді орындаудағы негізгі мәселелер де Жолдауда баса айтылды. Осы орайда Елбасымыз «Нұрлы жол – болашаққа бастар жол» атты Жолдауында былай деді: «Біз жалпыұлттық идеямыз – Мәңгілік Елді басты бағдар етіп, тәуелсіздігіміздің даму даңғылын Нұрлы Жолға айналдырдық. Қажырлы еңбекті қажет ететін, келешегі кемел Нұрлы Жолда бірлігімізді бекемдеп, аянбай тер төгуіміз керек. Мәңгілік Ел – елдің біріктіруші күші,

ешқашан таусылмас қуат көзі. Ол «Қазақстан-2050» Стратегиясының ғана емес, ХХІ ғасырдағы Қазақстан мемлекетінің мызғымас идеялық тұғыры! Жаңа Қазақстандық патриотизм дегеніміздің өзі – Мәңгілік Ел! Ол – барша Қазақстан қоғамының осындай ұлы құндылығы».

Біздің ата-бабаларымыз өсиет етіп қалдырған Мәңгілік Ел идеясын жүзеге асыру бүгінгі аға буын өкілдеріне бұйырған екен. Бүгінде ол мемлекеттілігіміздің негізгі жалпыұлттық идеясына айналып отыр. М.Әуезов атындағы ОҚМУ-дың жастары Елбасымыз Н.Ә. Назарбаевтың «Мәңгілік Ел» ұлттық идеясынан рух алып, ұлт көшбасшысының саяси курсына қолдауға бүкіл Қазақстандық жастарды біріктіру мақсатында Жастар қозғалысын құру туралы бастама көтеріп, ашық дауыс арқылы «Мәңгілік Ел» Жастар қозғалысы» қоғамдық бірлестігін құрды және де өткен жылы еліміздің барлық жастарына үндеу жариялаған болатын. Бүгінгі таңда университет студенттері «Мәңгілік Ел» Жастар қозғалысы» қоғамдық бірлестігі аясында көптеген игі істерді жүзеге асыруда. «Мәңгілік Ел» жалпыұлттық идеясын өміршең етудегі маңызды факторлардың бірі – ол ел бірлігі. «Бірлігі бар ел озады» дегендей, біздің қол жеткізген барлық жетістіктеріміздің негізгі себебі ол – елдің ауызбіршілігі мен татулығы. Елбасы Жолдауда осы мәселені де дәп басып айтты: «Біздің кейінгі ұрпаққа аманаттар ең басты байлығымыз – Ел бірлігі болуы керек. Осынау жалпыұлттық құндылықты біз әрбір жастың бойына сіңіре білуге тиіспіз». Елімізде 130-дан астам ұлттың өкілдері Қазақстан Халқы Ассамблеясы төңірегіне топтасып, этносаралық келісім мен толеранттылық негізінде тіршілік кешуде. Қазақстан халқының достығы мен татулығын көзіміздің қарашығындай сақтап, тәуелсіздік пен тұрақтылықты қоғамның басты құндылығы ретінде жастардың бойына сіңіре білуіміз қажет. «Жұмыла көтерген жүк жеңіл» дегендей, тек бірлігі күшті ел ғана осынау қиын кезеңнен сүрінбей өтеді. 2015 жылы Қазақстан халқы Ассамблеясының 20 жылдығы салтанатты түрде атап өтіледі. Ұлт көшбасшысы Н.Назарбаев «Нұрлы жол – болашаққа бастар жол» атты Жолдауында: «Біз 2015 жылды Қазақстан халқы Ассамблеясы жылы деп жарияладық. Елдің тұтастығы мен бірлігі, татулығы мен тыныштығы ең басты назарда» деп саяси мәні

зор атаулы мерейтойға ерекше мән беріп отыр. 30-дан астам ұлт өкілдері білім алып жатқан университетімізде де ұлтаралық татулық пен ынтымаққа ерекше мән берілген. Жастар арасында татулық пен бірлік – біздің басты байлығымыз деген түсінік қалыптасқан. Саяси сана-сезімі мен белсенділігі жоғары жастардың бастамасымен 2003 жылдан университетте студенттік Кіші Ассамблея құрылған болатын. Білім алып жатқан түрлі ұлт өкілдерін топтастырған бұл ұйым, этносаралық келісім мен толеранттылықтың, ұлттық мәдениет пен салт-дәстүрлерді дамытып, насихаттаудың озық үлгісі болып табылады. 2012 жылдан бастап бұл ұйымның атауы «Достық» деп өзгертілді, оның құрамында 30-дан астам ұлт өкілдері, 1700-ден астам студенттер жұмыс жасауда. Студенттеріміз мәдени тұрғыдан өзара ынтымақтасуы және әр ұлттың өз әдет-ғұрыптарын дәріптеп отыруы үшін көптеген іс-шаралар атқаруда. Клуб мүшелері университет көлемінде ғана емес, тіпті қала, облыс және республика деңгейіндегі түрлі іс-шараларға белсенді түрде қатысып, ұлттық-мәдени орталықтармен тығыз жұмыстар жасап келеді. Сонымен бірге еліміз бұл жылы Қазақ хандығының 550 жылдығын, Ата заңымыздың 20 жылдығын, Ұлы Жеңістің 70 жылдығын атап өткелі отыр. Бұл мерейтойлар асқан ерлік пен отаншылдықтың, қайсарлық пен қаһармандықтың мерекесі. Осы атаулы тарихи оқиғалар жастардың бойына Жаңа Қазақстандық патриотизмді сіңіруде айрықша мәнге ие. Өскелең ұрпақты отаншылдық, ұлттық рухта тәрбиелеу – бүгінгі зиялы қауымның алдында тұрған міндеттердің бірі. Тәуелсіз еліміздің мүддесімен қатар, болашақ ұрпақтың рухының сақталып, нығаюына ықпал ететін әрбір тарих тағылымына ерекше мән беруіміз қажет.

Бүгінгі таңда университет ұжымы жаңа мүмкіндіктерді пайдалана отырып, заманауи жаңа технологияларды меңгерген, жаңаша ойлайтын білімді мамандар дайындауда. Біздің мақсатымыз – студенттерімізге тиісті білім беріп қана қоймай, оларды рухани жағынан кемелденген тұлға ретінде тәрбиелеу болып табылады. «Мәңгілік Ел» болуды мұрат етіп отырған еліміздің болашағы отаншыл, ұлтжанды, тәрбиелі ұрпақтың қолында. Ендеше Елбасымыз нұсқаған «Нұрлы жолмен» баянды болашаққа қадам жасайық!

”

Еліміздің дамуының саяси бағыты, түпқазығы «Мәңгілік Ел» идеясын жүзеге асыру жолында еңбек ету бүгінгі күннің негізгі қағидасына айналып отыр. Бүгінгі таңда тәуелсіз елімізді «Мәңгілік Ел» етуді мұрат етіп отырмыз. Осы арман мұратымызды жүзеге асыру жолындағы міндеттерді орындаудағы негізгі мәселелер де Жолдауда баса айтылды. Осы орайда Елбасымыз «Нұрлы жол – болашаққа бастар жол» атты Жолдауында былай деді: «Біз жалпыұлттық идеямыз – Мәңгілік Елді басты бағдар етіп, тәуелсіздігіміздің даму даңғылын Нұрлы Жолға айналдырдық. Қажырлы еңбекті қажет ететін, келешегі кемел Нұрлы Жолда бірлігімізді бекемдеп, аянбай тер төгуіміз керек»

” *Жолдауда айтылған негізгі өзекті мәселелер, ол еліміздің экономикасын одан әрі жетілдіруге, көліктік, энергетикалық, индустриялық және әлеуметтік инфрақұрылымдарды, шағын және орта бизнесті дамытуға бағытталған*